

## Majikan boleh dipenjara angkara sijil vaksinasi palsu



MAJIKAN perlu memastikan sijil vaksinasi yang dikemukakan oleh pekerja mereka benar-benar tulen. – CAMBAR HIASAN/AFIQ RAZALI

Oleh Mohd Nizam Mohamad Yatim 25 Januari 2022, 8:30 am

SAUDARA PENGARANG,

SEMUA tahu, masalah sijil cuti sakit (MC) palsu masih berlaku walaupun pelbagai langkah dilaksanakan bagi membanterasnya.

Gejala itu menyebabkan Suruhanjaya Pencegahan Rasuah Malaysia (SPRM) baru-baru ini membuat video pesanan khidmat masyarakat bertajuk MC Boleh Jadi Rasuah.

Belum habis gejala itu dibanteras, baru-baru ini kita dikejutkan dengan pendedahan seorang doktor berusia 51 di sebuah klinik swasta di Marang, Kuala Terengganu yang ditahan polis kerana disyaki mengeluarkan sijil vaksinasi Covid-19 palsu.

Siasatan awal mendapati seramai 1,900 individu didapati berurusan dengan klinik itu (untuk tujuan vaksinasi). Daripada jumlah itu, pihak berkuasa masih menyiasat berapakah jumlah sebenar yang hanya mendapat sijil vaksinasi palsu.

Difahamkan setiap individu yang ingin mendapatkan sijil vaksinasi palsu ini perlu membayar antara RM400 hingga RM600 berbanding harga sebenar suntikan RM300 sahaja.

Kes jenayah itu yang sedang disiasat polis di bawah Kanun Keseksaan membuatkan kita bimbang kemungkinan wujud banyak lagi kegiatan penjualan sijil vaksinasi palsu di klinik-klinik lain di seluruh negara.

Oleh yang demikian, adalah penting untuk semua pihak termasuk majikan memainkan peranan masing-masing bagi memastikan kegiatan penjualan sijil vaksinasi palsu tidak berterusan kerana ia akan menyukarkan negara kita membendung penularan Covid-19 dan semua jenis mutasi yang ada.

Sijil penerimaan suntikan vaksin Covid-19 hanya diberikan kepada individu yang sudah lengkap menerima dua dos suntikan.